



39^e Hoegste Oondersjeing in 't jaor 2022

Ein vaan de hoegtepunte vaan 't jaor is veur vääle vaan Lummel en Nazareth en ouch veur us, de touwkinning vaan de Hoegste Oondersjeing, in dit geval vaan 't jaor 2022.

De Hoegste Oondersjeing weurt jaorleks touwgekint aon 'nne persoen, 'nne gróp, vereininging of stiechting die zich zoonder de tesse te völle of mèt de boors veuroet te loupe op vrijwèllege basis inzet veur de gemeinsjap Lummel en/of Nazareth.

Allewel en oondaanks tot 't eders kier lestiger weurt door 't opdoeke vaan miejer vereininge, door 't sterk verandere vaan de indentiteit vaan us 2 parochies, 't leie tekort bij vereininge of door de polletiek en 't gekoze woeningbeleid, of 't wegvalle vaan veuraonstaonde lui die zich inzette veur de buurt, höbbe veer dit jaor toch weer get hiel sjoens gevoonde.

De kemissie, die dit jaor de kääs heet bepaold, bestoond oet aajd prins. alweer vaan veur de corona-tied, Prins Philip d'n Ierste vaan 2020, 'nne beëdigde Braniemeeker en lid vaan de kanselierijraad, Jos Rokx en 'n beëdig jäägkemiessielid vaan de Braniemeekerkes, in dit geval Jääg-President Jo Boumans.

Op de boetegewoen geheim vergadering, boe in veer 'ne winnaar móste oetzeuke, ginge weer hiel get gegadegde euver de taofel. Veer móste jammers 'ne gooje opvolger zeuke veur de winnaars vaan veureg jaor; de initiatiefnummers en de vrijwèllegers vaan de "Tuttbelle Club vaan Mestreech".

Meh gelökkeg zien d'r nog altied lui die 't hart op de gooj plaots höbbe en ziech in wèlle zette veur de gemeinsjap zoonder dao zelf beter vaan te mote weure.

Heerlijk toch, este nog altied oonderein kins ensele, euver de kandidaote die 't zouwe kinne weure. Veer höbbe in de historie, vaanaof 1984 tot en mèt veureg jaor, noe al 38 lui of vereininge in 't zönneke kinne zette, die allerlei zakes hielemaol vrijwèlleg en op de achtergrond doen, veur vereininge of veur de buurt, veur iemes zörge of es gróp get sjoens doen veur de gemeinsjap Lummel/Nazareth.

Leef luij 't zal veur uuch wel dudelek zien, de 39e Hoegste Oondersjeing vaan CV de Braniemeekers in 't jaor 2022 is touwgekint aon:

De veurzitter vaan BuurtNetWerk Lummel;

d'n hier Chris Meys.



Veer felicitere Chris daan ouch vaan harte mèt dees beneuming.

Vaanzelfsprekend zien de felicitaties ouch veur zien vrouw Sjoertje en al zien mètwèrkers en bestuursleie die ziech allemaol ein veur ein, belangeloos inzètte veur de buurt Lummel.

Veer hope vaan ganse harte tots diech Chris, dat sjeke en dèks ouch oondaankbaar wèrk wijer wèts door te zètte en tot d'r nog hiel vööl doele veur Lummel bereik mage weure!!!

Aldus beslote, Lummel, zondag 20 fibberwarie 2022

Naomes de kemmissie Hoegste Oondersjeiing en Prezidium CV de Braniemeekers

President Roy Beaumont & Opper-Moeljaan Marcel Coolen





Korte impressie vaan de winnaar "Chris Meys"

Edere wèrkdaag gans rösteg, oontspanne, 'r vèlt zjus neet um.

Vaan de Baliuweeg nao de Populierweeg en daan door de Askalonstraot, de Sionsweeg en de Sareptastraot, onderweeg op ziene fiets door Lummel, nao 't stadhoes.

Jao, rösteg en oontspanne tot zien druimende ouge bove ziene grijze baard op d'n hook vaan de Sionsweeg/Sareptastraot aondach gaove aon 't hoes mèt d'n tore!

Dat waors 't ierste momint tot Wum, aajt hoof vaan de aofdeiling Stedebouw vaan de gemeente Mestreech en ouch de pap vaan Chris Meys 'n zäötsje lag boe Lummel de lèste 6 jaor biezunder vööl aon te danke heet. Dat taffereel is noe al mie es 11+2 jaor geleie. Same mèt Sjoertje Vos woent Chris in 't hoes aon de Sionsweeg mèt deen tore wie Chris zelf al zag. In die 13 jaor is vööl gebäörd!

Wum Meys, de pap vaan Chris, mèt ouch 'n werm hart veur Lummel en motivator is d'r jaomer genóg neet mie.

Chris zien weegske woort op 8 november 1980 gevöld en stoont in Amie. Nao 'n paar jaor en es 'ne kroekestop waor Chriske al de leier vaan 'n bende die de naam Bokkerijers neet zouw misstoon.

Amie waor in de jaore 80/90 vaan tied tot tied oonveilig. Nao de middelbaar sjaol góng Chris gesjiedenis liere in de hoofstad vaan Nederland, Amsterdam oftewel Mokum.

Allewijl wèrk heer veur de gemeente Remund mèt es taak mónnuminte en cultureel erfgoed.

Dat deit heer 3 daog per week vaanoet dat hoes mèt deen tore.

Neve dat hoes zouw 'n aander hoes verkoch en umgeturnd weure veur get "Lummelse Doeve", zoe wie veer euze studente in Lummel neume.

Dao staok Chris e steveg stekske veur mèt behölp vaan Sjoertje, zien- en us oonmisbaar orakel.

Dat waor aonleijing tot 't koppel Meys/Vos of veur de geëmancipeerde onder us, Vos/Meys of doedgewoen Sjoertje en Chris, geïnfecteerd woorte door 't oetstervend virus BPV.

En BPV steit veur Börger-Participatie-Virus.



't góng rap want Chris woort veurzitter vaan de Buurtraod, wat neet lang daonao BuurtNetWerk Lummel zouw goon heite, zoe wie de gemeente Mestreech dat gere wouw.

D'n ierste strijt góng heer aon, same mèt zien vrouw. Es 'ne riechtege opper Bokkerijer veurop, woorte in 't stadhoes alle Heillegehuiskes umgestamp!

Rechveerdegheid is zien credo!

Ederein is evevööl, sociaol en ierlek alles verdeile of ouch wel in Balans geneump.

En of 't leie vaan 't BuurtNetwerk nog neet genóg waor, riechde heer same mèt zien vrouw en nog 'n aontal aander mètstrijers oet de wiek Brusselsepoort, Buurtbalans op.

't Meys-leger woord in stèlling gebrach en de gemeente Mestreech had dao geine gemekeleke aon: "De Doeve (studente) móste jammers ierlek verdeild weure euver de ganse stad en daodoor kraog, door oonder aandere ziene inzat, eder straot in Mestreech 'n studente quotem opgelach.

't WOP, dat steit veur; Wiek Oontwikkelings Plan, woort gesjrap en dat waor 'n regelrechte sjan en d'n doedsteek veur Lummel. Al op al woort gezat um te kriege boe Lummel rech op had, en Balans waor weer 't credo!

Plan Hoolhoes, Askalonstraot en de Kop Balijeweeg/Populierweeg bleve in 't plan stoon.

Noe, in 2022, kinne veer eus dao vaan euvertuige; Plan Hoolhoes en de hoenser zien zoe wiet es veerdeg. Plan Askalonstraot geit in de zomer vaan start en Plan Balijeweeg/Populierweeg neet lang daonao.

Meh... d'r ligk nog 'n zier pienlek dossier, dat de lèste 50 jaor tig kier aofgestöb woort, meh weer tig kier door de gemeente Mestreech trök in de ieskas is gelag....

En dat is:

NATUURLEK WOENE IN LUMMEL AON DE MAOS!

't Dossier boe Chris ziech in vasbit met de hölp vaan nètwerkens en mètwerkens oet Lummel. Dao neve neet te vergete zien aander bestuursleie; Joke de Jong, Monique Franssen en Jack Ummels en de nestor-advisäör Huub Smeets en noets te vergete eus Lummels Orakel en zien vrouw Sjoertje.

NATUURLEK WOENE IN LUMMEL AON DE MAOS! Is 't ultieme börgerparticipatietrajek en dat weurt door Chris geleid wie 'ne echte Lummelse börgervaajer.



Zoe geëngageerd wie heer is, heer zal 't noets loslaote, dee Bokkerijer!
Daag in daag oet, daag en nach, eder menuut vaan d'n daach is heer daomèt bezeg.

Lummel aon de Maos, 't zal en 't moot d'r koume.....

Dee jonge maan, noe ouch al mèt 'ne grijze baard, dee mèt dee oonbeteugelde inzat veur Lummel en die mega groete winnersmentaliteit, verdeent zier zeker 'n pluim op ziene hood en 'n veer in zien vot.

Es heer daan astrein ouch nog de han op ein geit kriege tot d'r gein megaloods geit koume mer tot veer hoester goon kriege, daan goon veer obbenuits de straot op in Lummel en wèlle veer geine aandere daan Chris Meys es börgemeister vaan Lummel.

Meh veur tot 't zoe wiet is en veur tot veer de veendels goon oethaange wèlle veer häöm noe al laote blieke tot veer gruuts op häöm zien en daomèt, proclamere, annoncere, verordenere en declamere veur tot 't us kin apprèciëre en tot veer häöm decorere mèt ... De Hoegste Oondersjeing 2022 vaan CV de Braniemeekeers vaan Lummel en Nazareth. Chris vaan harte Perficia!

Mèt groete dank veur de inhawweleke details aon Jack Ummels.

